

■ COLUMNA

Igl è lubì da midar opiniun

DA MARIA CADRUVI

Attenziun! Tgi che legia Asulettamain il titel da questa columna po crair ch'jau fetschia reclama per ils giratotonas, ils «Wendehals», quels che midan lur opiniun cun mintga suffel. Mia intenziun è in'otra: Punctuar ch'il carstgaun ha la libertad da guardar sin insatge cun differents egliers ed or da differents puncts da vista. Quatras èsi pussaivel ch'el vesa tuttenina chaussas ch'el n'aveva betg remartgà avant, chaussas che pon midar sia opiniun.

Dal politicher Leonhard Flepp (1923–2003) da Panaduz vegn raquintà: In schurnalist l'aveva renfatschà ina giada ch'el haja ditg curt temp avant exact il cuntrari da quai ch'el dia ussa. Flepp haja respundi: «I n'è betg scumandà da midar si'opiniun e da vegnir pli intelligent qua tras.»

Avant passa 30 onns hai Ajau fatg in curs dad astrologia tar Thomas Ring (1892–1983), in pictur, scriptur ed astrolog tudestg. Duas chaussas da quest um sabi na vegn jau mai ad emblidar. Ina è stà sia intimaziun da dubitar ed en il medem mument restar visiunari e realistic, perfin en chaussas da stailas. La segunda chaussa che



Thomas Ring aveva ditg cun in surrir citesch'jau gugent sch'jau hai gist midà opiniun: «Tgi che na cuntradi a sa sez trais giadas al di è in pedant.» Quai è per mai anc oz il bigliet per ir en l'otra direcziun – sch'i fa senn.

Viktor E. Frankl (1905–1997) il fundatur da la logoterapia metta schizunt a cor da midar opiniun e tenuta en la vita, betg cuntinuadamain, ma en mintga cas sche la veglia tenuta impedescha da viver ina vita cun senn e qua tras en ventira. In exempel: Sch'in sportist fitg talentà arriva suenter in grev accident en la sutga cun rodas enstagl da sisum il podest, lura sto el midar sia opiniun e sia tenuta envers ses cuntegns e ses pensums da la vita. Sch'el vegn da far quai sche s'avran pli levamain novas portas, novs orizonts ed el survegn forsa – malgrà il grev culp dal

destin – curaschi da cuntinuar sia via.

Per fortuna na dovri betg adina culps dal destin, terratrembels e tsunamis per ch'ils carstgauns vegnian pli intelligents e midian opiniun. Mintgant basta era la buna voluntad, la sauna raschun, in spiert da reconciliaziun ed in zichel distanza. Qua datti bleras pussaivladads. Per exempel: Far insaquant pass davent dad ina situaziun bloccada e la guardar cun ils eglis d'insatgi che vegn d'ordaifer. Ubain s'imaginar ch'i saja ussa 30 onns pli tard e sa dumandar: «Tge fiss stà lezza giada, avant 30 onns, la meglra decisium?»

Betg tut las midadas d'opiniun ston vegnir manifestadas. I dat da quellas che madiran be plaun en il zuppà. Autras capitane andetgamain sco ina midada copernicana suenter in eveniment da «aha, ussa bain, jau chapesch». Midadas d'opiniun èn pass en il process d'emprender. Latiers vegn che nus carstgauns avain gugent romans da midadas ed istorias da Saulus a Paulus. Savens èn quai er istorias che fan curaschi, dattan impuls e tiran endament ch'igl è pelvair lubì da midar opiniun.

maria.cadruvi@spin.ch